

a de lindegass

i wohne emne chliine kaff ond jede kennt mis gsicht
ond jede weiss sit geschter scho die auernöische gröcht
das wäri ou äüä emmer so blibe, mis läbe esch definiert
aber do esch är cho, är sigi jong ond schön, i has scho lang vernoh
jetz hani ehn ou säuber gseh, es gsicht us siide ond samt
ond was är sösch no het esch secher meh als adrett - jo i wett ehn jo
ehn

**är wohnt a de lindegass
im huus nommero 9
em zwöite stock grad vis-à-vis vo mer
was chan e drför**

das goht jetz scho e wiili so, ond kes ändi i sicht
cha weder schlofe, no ässe, ond mag nömme uf d'schicht
drom hani ou vöu büecher gläse, wie mes macht ond was me so seit
doch i ha mi ned drför, go z'lüüte go a sini tör, met blueme oder so
es zerrt a mer bes i zerrige ha, doch ke dokter weiss rot
i wett doch so gärn i sine arme ligge, bevor dr winter, dr winter, dr
winter naht

**är wohnt a de lindegass
im huus nommero 9
em zwöite stock grad vis-à-vis vo mer
was chan e drför**

*jetz esch es sowiit ond i gange zo ehm
ond säge wie gärn i ne ha
doch nei was muess i gseh - herrgott wie tuet das weh
är kösst en andere maa*

**är wohnt a de lindegass
im huus nommero 9
em zwöite stock grad vis-à-vis vo mer
was chan e drför**